

Kalaallit Nunaanni aalisarnermi pisarineqartut isumalluutini atuinermut akitsuutaat pillugit Inatsisartut inatsisaata allangortinneqarnera pillugu Inatsisartut inatsisissaatut siunnersuut

(Aningaasaqarnermut Nunamullu Namminermut Tunngassutilinnut Naalakkersuisoq)

Saqqummiussissut

(Aningaasaqarnermut Nunamullu Namminermut Tunngassutilinnut Naalakkersuisoq)

Siullermeerinnineq

Aningaasanut inatsimmut isumaqatigiissuteqartut partiit (Partiit isumaqatigiissuteqartut) aalajangerput aalisarnermi pisarineqartut isumalluutini atuinermut akitsuutaasa assigiinngitsut ulloq 1. januar 2022-mit atuutilersumik allangortinneqarnissaannik. Immikkut sinerissap qanittuani qaleralinniarnermi akiitsuut 2022-mi 0-imut inissinneqarnissaa kissaatigineqarpoq.

Taamatut akitsuutip atorunnaarsinneqarneranut aningaasalersuineq pissaaq avataasiorluni qaleralinniarnermi raajarniarnermilu akitsuutit qaffanneqarnerisigut.

Akileraarutit akitsuutillu pioreersut qaffassagaanni nutaanillu atulersitsissagaanni piumasarineqarpoq nutaamik inatsisiliortoqassasoq. Tamanna toqqammavigalugu Naalakkersuisut inatsisissatut siunnersuut ilanngunneqartoq nalunaarutigivaat Inatsisartut matumani ataatsimiinneranni suliarineqartussanngorlugu naammassineqartussanngorlugulu.

Naalakkersuisut Inatsisartut Siulittaasoqarfiat qutsavigaat immikkoortup oqaluuserisassanut ilanngunneqarnissaanut akuersimmata.

Pisuussutini atuinermut akitsuut inatsimmi maannamut atuuttumi avataasiorluni qaleralinniarnermi raajarniarnermilu, avammut tuniniarneqartuni allanulluunniit tunniuneqartuni, sinerissap qanittuani raajarniarnermi avataasiorluni saarullinnik, kullerini, saarulliusaanik suluppaakkanillu aalisarnermi akitsuutinut atatillugu naleqqussarneqartarpoq.

Inatsisissatut siunnersuutip matuma suliarineqarnissaanut piffissaq sivikitsuararsuaq atorneqarmat taamaattumik pisariaqarsimavoq aalisakkanut taaneqartunut tamanut akitsuutip qaffanneqarnissaa, tassami sinerissap qanittuani raajarniarneq, saarullinnik suluppaakkanik, saarulliusaanik kullerini avataasiorluni aalisarnermi akitsuutit inatsimmi taamatttoq ikaarsaariarnermi aalajangersakkani maannakkutut inissisimanerat aalajangiusimaneqarmata. Tamassuma inatsisip paasiniarnernut ajornakusoortitsilersinnaavoq, taamaattumik Naalakkersuisut 2022-p ingerlanerani inatsisip allangortinneqarnissaa siunertaralugu siunnersuummik saqqummiussaqaassapput, taamaasilluni avataasiorluni raajarniarnermi qaleralinniarnermilu akitsuutit aalajangersaaffigineqartarnerat sinerissap qanittuani raajarniarnermi avataasiorlunilu saarullinnik, saarulliusaanik suluppaakkanik kullerini

aalisarnermi akitsuutit pillugit aalajangersaasarneq taamaasillutik immikkoortinneqalerlutik. Paatsoortoqaqqunagu erseqqissa inatsisissatut siunnersuutaasussa partiit isumaqatigiissuteqarsimasut isumaqatigiissutaannik tunngaveqassamat.

Taamatut oqaaseqarlunga inatsisissatut siunnersuut Inatsisartuni suliassanngorlugu saqqummi-uppara.